


P. VATTELAPESCA
(P. LUCCIANA)

U Sciò Uncinu

CUMMEDIÒLA IN 3 ATTI

Segonda edizione curetta



BASTIA

TIPOGRAFIA EDITRICE OLLAGNIER

1903.

46293.

Bo 172

PERSONE:

UNCINU, *becchiu usuraiu.*

CAMILLU, *u figliòlu.*

PEPPA, *a figliòta.*

MAI, *a serba.*

CHECCU, *filantropu, amicu di casa.*

(*A scena si passa in casa di Uncinu.*)

L'AVARU

È l'avaru un saviu-idiòta,
Chi s'allòga spessu u pane
Per u pranzu di dumane,
E ba in lettu a panza viòta ;
Sicchè, per ecunumia,
Si ne mòre d'anemia.

ATTU PRIMU

*(Una gran sala piena di mòbili di epuche,
forme e valore diversi, una specie di
vuttea di rigattiere).*

SCENA I.

PEPPA e MAI

Mai


O Signora Pippù, mai per cummandu!
Sciò mi dia un cunsigliu!

Peppa (ridendu)

Mi pigli p'ona vecchia! I cunsigli, dum-
mandali a babu chi n'ha e stacche piene.

Mai (ridendu)

U sciò Uncinu un dà nulla di vada,
manc'u lon ghiornu! ed eo un n'aghiu



sòlli da spende per chiecchiare.... D'al-
tronde, quì u so vabu un mi pò serve.

Peppa

Percosa ?

Mai

Sciò vòle ch'ellu mi cunsigli contr' a sè
stessu ?

Peppa

Oh, parla un po' senza metafare !

Mai

Gulinteri ! e mi spicciu in quattru paròlle.

Peppa

Ne hai già dettu tante inutile ! Au fattu !

Mai

Eccu : rimisi, tempu fa, mille franchi au
padrone, e miò ecunomie di trent' anni.

Peppa

Sò in mane sicure.

Mai

Ancu tròppu, ch'un li vòle cappià !

Peppa (ridendu)

E di cosa ti lagni ?

Maì

Ch'un mi fruttinu nunda !

Peppa

Perchè un li piezziâ Cascia di risparmiu ?

Maì

È appuntu a miò intenzione, e l'esternai
au sciò Uncinu... Ma ellu face nicc d'un
sentemi o mi sòrte fòra cun mille cavilli...
Sciò sà, Signuria un si n'offendi ! Ma u so
vabu ha e mane fatte a ganciu : quellu chi
c'entra, è difficile levallilu senza purtà bia
u pezzu... Oh, s'ellu sumigliassi ai figliòli,
au sciò Camillu o a Signuria ! Questi sì,
chi sò beri cristiani : si spuglierebbenu d'a
camiscia per bestene i poveri !

Peppa (ridendu)

Minca davant' à jente, n'è ?

Maì

U sciò Uncinu va in chiesa tutt' i jorni,
si cunfessa e cummunica ogni settimana :
ma, sia dettu cun rispettu di Signuria ! è
un Ebreo.

Peppa

Si' una malpensa.

Mai

Perchè un mi rende i miò sòlli ?

Peppa

Fòrse ne u to interessu : sò tanti i piezamenti chi banu a male !

Mai

Sciò un m'ha dettu che a Cascia di risparmiu è sicura ?

Peppa (ridendu)

Un c'è nulla di sicuru che a môrte.

Mai

Tandu manc' u sciò Uncinu. .

Peppa

Sappiami capì ! Ellu è riccu, e d'u tóiu risponde a so furtuna.

Mai

Ma d'i miò mille franchi, un devu riti-ranne nunda ? E fruttanu chi sà quantu au padrone !... Oh, s'ellu fussi cumme i so figliòli o u sciò Checcu !

Peppa (ridendu)

Per te u periculu saria grende.

Mai

Cumme ?

Peppa (c. s.)

Se persone hanu e mane aperte...

Mai

Cumme u so còre...

Peppa (c. s.)

E si puterebbenu perde pe i chiassi i to velli marenghini !

Mai

Signora, ' no ! Sò generosi d'u sòiu, e minca di quellu dill'altri, d'i poveri soprat-tuttu.

Peppa

Hai regiò .. A dissi per celia.. Ma disgraziatamente in st'affare eo un ti pòssu juvà : babu mi stà a sente cumme i topi a beghia.

Mai

Tutt' u so amore è pe u sciò Camillu, e si lu merita, u ricunoscu .. Li dà ancu, pe i so piegeri, centu franchi au mese, ellu un avarone !

Peppa (ridendu)

Cosa vòli ? è maschiu.

Mai

E tandu e femmine un sò nunda ?

Peppa (c. s.)

In Còrsica pocu, e in sta casa un zeru !

Mai

Salvu, però, n'e malatie, chè allora
òmmu si racumanda a elle.

Peppa

Oh, lascemmu ste chiappule !. . Bòli
ottene quàlcosa da vabu ?

Mai

Sì, u meo...

Peppa

Ebbè, ricori a Camillu, e l'averai...

Mai

Sciò li ne parli Signuria : u so fratellu è
bravu, e a tene cara...

Peppa (impaziente)

Cusì faremmu... Avà dimmi, o Mai,
cos' avia stammane u sciò Checcu a discore
tantu cun te?... Pariate dui innammurati...

Mai (ridendu)

Si accarezza spessu u cane p'o padrone.

Peppa

Di cosa ti parlava ?

Mai (maliziosa)

Di tante cose !

Peppa (impaziente)

Oh, sbocca una vòlta !

Mai

Prima d'u so ospiziu, duve si ricuverò
una mia parentella... Sciò sà, Memmetta...

Peppa

A turtaia ?

Mai

Gnor s'ì ! ha avutu un attaccu, e un pô
più m'ovesi...

Peppa

A corcia ! Ma ella ha figliòli...

Mai

Tutti p'vari in canna e cun famiglia, e
un la p'nu succore.

Peppa

E tandu u sciò Chcccu ?

Mai

Un li la dissi ? Mi parlò dill'ospidale,
d'a miò parente, tutte scuse per ghiunghie
a discore di Signuria.

Peppa (ridendu)

Cosa c'entru eo cun l'ospidale ? Un sò
minca infermera !

Mai (ridendu)

Per ellu sì, che sciò saria adatta !

Peppa (c. s.)

È forse malatu ?

Mai (c. s.)

Assai ! ed'un male chi pò solu guerì quellu
ch'u fecc !

Peppa (impaziente)

Oh, ripetimi un pocu e so paròlle ! Un ti
le fa strappà di vocca cu e tanaglie a una
a una !

Mai

Un mi le pòssu rinvene tutte...

— 11 —

Peppa

Cerca di ricordattile !

Mai

Avà mi ne vene una...

Peppa

Quale ?

Mai

Ah ! — mi disse ellu c'un suspiru —
Furtunatu se putissi chiamalla sposa
prestu !

Peppa

E tu un li rispondisti nulla ?

Mai

Gnor sù ! E più furtunata ella ! — li feci
eio...

Peppa

Imbè ! Ti si' fatta male cun se quattru
paròlle in croce !... Ma cosa ti rispose ?

Mai

Nulla...

Peppa

È pocu !

Mai

Ma suspirò più fòrte, cumme per dimmi :
— In stu mumentu è impossibile u matri-
moniu.

Peppa

Percosa ?

Mai

Sciò sà bè ehe a fabbrica dill'ospiziu l'ha
messu a quadernu : l'architettu, i mura-
tori e i merchanti l'hanu ingannatu.

Peppa

È cusì bònu !

(entra *Uncinu*).

SCENA II.

E PRECEDENTE e UNCINU

Uncinu (penserosu)

Di tanta roba data â fruttaia, un ne ritiru
che ôttu franchi ! Un si pô più campane !...
Cuntemmu un po' : un francu di presche --
ed eranu cusì belle ! — dui di fravule, fa-

cenu quattru, e cinque di varacòcche, sà
nòve... Ah, ah! ti pigliu c'a mana ind'o
saccu, o ladrò! U contu è chiaru, un ci si
scappa: unu e dui quattru...

Peppa (suridendu)

Facenu tre, o vabà...

Uncinu (picchiendusi in fronte)

Hai regiò! Bisogna chi m'impari l'ab-
bacu una scimmeria! Cuntava unu di più!

Mai (pianu a Peppa)

Per riceve! Se fussi statu per dà averia
cuntatu unu di menu.

Uncinu (uspricc a Mai)

Cosa vatacchj?

Mai

Eo, nunda! Faccia un contu anch'eo.

Uncinu

Bai in cucina, chi mi ruini qui e tumette
cu i to scherpacci!

Mai

E per l'affare?

Uncinu

Ne riparleremmu a quattr'òcchj... A

propòsitu, Maì ! Percosa hai lasciatu u
gherbone accesu ?

Mai

Appena dui pezzetti pe a tisana.

Uncinu

Eo un sò malatu !

Peppa

È per me : mi sente u stòmmagu.

Uncinu

Manghj tròppu ; e pòi ti lagni !

Maì

Se manghia quant'on agellu !

Uncinu

D'i gròssi, però ! Li ci vòle quasi una
libra di pane au jornu !

Mai (pianu)

Li pesa anc' u pane !

Uncinu (a Mai)

Un'altra cosa : e pòrte, un le chiode
cusi fòrte ! Si schiunzuleghianu e serature,
e s'incrinanu e tramezzane... Ti avertu
che, se ci sò guasti, i pagherai tu...

Mai

Pagheragghiu u veechju p'o nòvu ! In
sta casa è tuttu scundisatu...

Uncinu

Grazie a te, o ciafagliò, che d'a roba
dill'altri un ne teni eontu !

Mai

Più che d'a mea !

Uncinu

Alle corte ? Torna in cueina, e spen-
ghimi su furnellu ? Ma un ei jittà ecqua
sopra, eh' u feresti crepà !... Bai !

Mai (pianu, andendusine)

Creperai tu prima.

(esce Mai).

SCENA III.

UNCINU e PEPPA

Uncinu

Sta serbaccia diciaccegghia sempre. ,

Peppa

Ogn'a perdunalla : è becchia... Ma è cusì fidata !

Uncinu

Una scialacquatora ! E tu li dai l'esempiu d'u disordine.

Peppa

Eo ! Mi pare d'esse vé regulata !

Uncinu

Ti pare, ti pare ! Eo accunzu, e tu sciuppi !

Peppa

Cosa ? E robe mi duranu più d'un annu !

Uncinu

E trôvi chi sia assai ? Stu vestitu, per esempiu, u pôrtu da dece anni, ed è sempre nôvu.

Peppa

E môde d'e dònne cambianu spessu.

Uncinu

Nell'interessu d'e sertore, e sciòcchi sò quelli chi si ruinanu per elle. . Ma cambiemmu di registru : perchè facisti lampà ind'o mullizzu l'òsse e i muzziconi ch'e

avia messu da vanda per bendeli au strec-
ciaiu?

Peppa

Puzzavanu cumm' on' erca!

Uncinu

E cose utile hanu sempre un bon odore...
Anc' u suu puzza, ma face cresce a roba,
e si vende... Pòrcu schifu un fu mai
grassu.

Peppa (ridendu)

Grazie d'a cumparazione!... E un sa-
pete cosa dicenu i duttori?

Uncinu

Cosa ne sanu s' ignuranti?

Peppa

Di medicina almenu si ne intendenu più
di noi.

Uncinu

Ma minca d' ecunumia! Ebbè cosa pre-
tendenu elli?

Peppa

Che n'è nòstre case e strade mullizzose
covanu e multiplicanu e malatie, cruppu.

tifoide, tubercolosa e tante altre che, in primavera e in autunnu soprattutto, facenu d'a cità un ospedale.

Uncinu

Ahù! a tempi mei, un c'eranu spazzini — manghiapani! — e si muria menu che avà!

Peppa

Perchè c'era menu pupulazione ..

Uncinu

Insomma, cusì bôgliu: un si deve perde nulla in casa mea.

(entra Camillu).

SCENA IV.

I PRECEDENTI e CAMILLU

Camillu

Un n'ete intesu a nutizia?

Uncinu

Quale?

Camillu

S'è persu u *Liban* a pochi metri d'a terra !

Peppa

Oh, Madòнна ! Si salvornu e persone ?

Camillu

Poche... Si parla di più di centu vittime, soprattutto dònne e criature !

Peppa (pienghiendu)

Oh, disgrazia !

Uncinu (agitatu)

E e lettare ?

Camillu

Si videnu scene straziante, dònne, vecchj e zitelli in dinòcchie, ai quali u mare affugò l'ultima priera, giovani sposi stretti insemmе per mòre ind'on abbrecciu, babi e mamme annigati per salvà i figliòli...

Peppa (c. s.)

Oh, Dio !

Uncinu (impaziente)

Ma e lettare ?

Camillu (nerbosu)

Cosa impòrtanu si pezzacci di cherta,
quandu è pastu d'i pesci tanta cherne
umana?

Uncinu (spasimante)

Ma in una di se lettare c'eranu per me
valori...

Camillu (c. s.)

E ne u vapora affundatu c'era per tanti
u tesoru più grende, a vita d'i so cari.

Uncinu

Coru subito â Pòsta a fa a miò reclama-
zione.

(esce Uncinu).

SCENA V.

CAMILLU e PEPPA

Camillu

Bergogna ' Pensà a quattru sullacci
mentre gridanu aiutu e vedue e l'orfanelli!

Peppa

Cosa putemmu fa per sullevalli?

Camillu

U sciò Checcu venerà a mumenti per
cumbinà qualcosa cun noi.

Peppa

Questu sì, ch'è un òmmu di còre, in
beru filantropu !

Camillu

Pensa menu a sé che all'altri... Ma
temu ch'un li còsti caru a so filantropia, e
ch'un li manchinu prestu i mezzi d'eserci-
talla.

Peppa

Spiegati !

Camillu

A sai cumme me : s'è ruinatu per s'ospi-
ziu, pigliendu sòlli in presta dall'usurai,
fra' quali c'è forse vabà...

Peppa

Ti lu disse u sciò Checcu ?

Camillu

No, ma l'induvinu

Peppa

A cosa ?

Camillu

Da qualchi ghiornu babà ronza intornu
à casa d'u sciò Checcu, cumme se ci fa-
cissi l'amore: deve avecci sopra qual-
ch'iputega.

Peppa

Un permetteremmu sa spuliazione.

Camillu

Feraghiu di tuttu per salvà l'amicu d'a
ruina...

Peppa

E noi d'a vergogna.

Camillu (suridendu)

E travagliendu per ellu, travagliu ancu
per te, chi devi esseli sposa.

Peppa

Da qualchi ghiornu, mi pare un po'
fredu.

Camillu

Enzi, è più infiammatu che mai. Ma in-
debitatu cumm'è, un pò dummandatti a
babu: sarebbe core a un smaccu sicuru.

(entra Mai).

Mai (annunziendu)

U sciò Checcu.

Peppa

Fallu entrà subito!

(esce Mai)

Camillu

È statu di paròlla!

Peppa

Cumme sempre.

(entra Checcu cun Mai).

SCENA VI.

I PRECEDENTI, CHECCU e MAI

Checcu

Ricoru a boi, cari amici, per pruvède a un urgente visognu. Irreparabile è a perdita d'e persone; ma i puvaretti chi ne furnu privi senteranu forse menu aspramente u so curdògliu videndusi oggettù d'un po' di cumpassionè. Bastia dede la-

grime sincere a tanta disgrazia; ma bisogna a succorela d'altru che di lagrime e paròle. E vedue e l'òrfani ci dumandanu pane.

Camillu

Eprimmu una sottuscrizione.

Peppa (levendusi un anellu di ditu)

St'anellu è un ricòrdu di mamma: bi lu do in so nome pe i puvaretti.

Camillu

Eo li abbandonu u miò mese, centu franchi.

Mai

Ed eo u meo, òttu franchi.

Checcu

O Mai, u vòstru òbulu è più graditu di l'altri, ch'è quellu d'u poveru.

(entra Uncinu).

SCENA VII.

I PRECEDENTI e UNCINU

Uncinu (giubilendu)

Vittôria, vittôria !

Camillu

Cos' è statu ?

Uncinu (mustrendu un dispacciu)

Mi dispacciò u vancheru ch'un n'eranu
sopra u *Liban* i miò valori.

Checcu

Ma c'eranu tanti Vastiesi, cunuscenti c
fôrse amici vòstri.

Uncinu

Chi colpa ci n'aghiu co ? Un duvianu
imbercassi, u mare è infidu.

Checcu (suridendu)

Meru di certe persone.

Camillu (a Uncinu)

Speru chi ci ferete scurdà cu i fatti e

vòstre paròlle cusì pocu umane: darete
ancu voi...

Uncinu (vivamente)

Eo un do nulla!

Camillu

Darete ancu voi, bi ripetu, l'esempiu d'a
carità, perchè questa soprattutto ci distin-
gue dae vestie ..

Uncinu (scuzzulendu e spalle)

Discorsi, discorsi! Si ruinanu e case
cun ~~se~~ parullone!

Camillu

Si aricchiscenu di virtù...

Checcu

Chi ghiovanu più d'i sòlli...

Uncinu (ironicu, a Checcu)

A boi v'hanu juvatu assai!

Camillu

Più ch'un cridete... Ma finimmu e
~~chiecchiare~~! Eo do centu franchi...

Peppa

Eo st'anellu...

Mai

Eo u miò mese.

Uncinu (ridendu sguaiatamente)

Eo nulla d'u tuttu ! Un n'è abbastanza ?

Camillu

O sciò Chè, iscrivitelu per duie centu franchi.

Uncinu (furiosu)

Duie centu stilitate chi li passinu u còre !

Peppa (pianu)

Chi mostro !

Uncinu (a Camillu)

Un sai, scimmò, quantu ci vòle a guadagnalli ? I primi centu mi custornu dece anni d'angoscia.

Camillu (suridendu)

Ma i secondi e i terzi ?

Uncinu

Assai menu, u confessu, ma sempre sudori e privazione.

Camillu (suridendu)

Date ai povari, o vabà, chi bi lu rende-
ranu a centu doppi in paradisu !

Mai (pianu)

Ci anderà a capu inghiò.

Uncinu (a Camillu)

Per un sentevi più discore, tè ! pigliati
stu franchettu !

Checcu (suridendu)

U figliòlu dà centu...

Uncinu

Perch'è scemmu...

Camillu

E u vabu unu ..

Checcu (c. s.)

Perch'è astutu...

Uncinu

Dommine !

Camillu (ridendu)

Sottuscrivite dunque per duie centu
franchi ; e se un li pagate, i piglieraghiu
in prestu a babu mòrtu.

Uncinu

Ingratu! Pe aricchitti mi privu d'u necessariu...

Camillu (seriu)

Ete tòrtu: a vòstra vita è per me a ricchezza più grande...

Uncinu (intennaritu)

A so chi mi teni caru, minca, però, quantu ti tengu caru eo... E un ti ne vògliu pe i to discursacci: un sò ferina tòia.

Camillu

E di quale?

Uncinu

Di stu diavulu d'u sciò Checcu chi mi scimmisce serba e figliòli!

Peppa

Un Santu!

Uncinu

Ma un pò mancalli u castigu: è ghià bicinu.

Camillu

Zittu, o vabà! ch'un bi senti mancu l'eria!... U sciò Checcu merita premi e no castighi...

Peppa

È l'onore di Vastia.

Uncinu (rabiosu)

U miò turmentu, e li do...

Camillu (suridendu)

I duie centu franchi?

Uncinu (c. s.)

No, a miò..... (maladizione.

Camillu e Peppa (benedizione.

(scende u tendone).

FINE DILL'ATTU I.

ATTU II.

SCENA I.

UNCINU, *solu (frittendosi e mane)*

Sia laudatu! Un ci sarà sottuscrizione in Bastia.. C'imbitanu a spedi sòlli a Marseglia! Fussi scemmu!... Si perdebberu in mare o ind'a stacca di qualchi pruvenzale...

I miò figliulacci e u sciò Checcu mandornu i sòi... Ma un m'hanu cercu, ch'eranu siguri di pigliassi una smustacciata... Cosa sò ste sottuscrizione?... Manghierie! E, d'altronde, questa a chi prò? I mòrti un n'hanu visognu di nunda, e ai vivi pruverà u Guvernu, ch'è pagatu ..

(passighiendu pensosu)

M'imparornu stu vellu pruverbiu tudescu, ch'e' vògliu inguadrà perchè stia sempre sott'all'òcchj d'i miò figliòli:
— *U sciòccu dà, u saviu piglia.* —

Cridia i Tudeschi eretichi tutti. Si vede che ancu fra elli c'è qualch'enima cristiana...

(firmendosi a un trettu)

Un spassigh'emmu tantu, chi si frazzanu i scherpi !

(stà per mettesi a pusà)

Ma un bisogna mancu pusà trôppu, chi si frazzanu e sedie e i calzoni !... Stemmu, quant'è pussibile, fermi in pedi, ch'un ne sòffrenu ma' ch'e gambe !... A jurnata d'òghie è stata vòna per me, grazie au Santissimu Crucifissu e à Madónna d'i Sette Dolori, ai quali mi sò racumm'ndatu : prestai sòlli au dece per centu, e a ghiente sigura, pigliendumi sopra beni stabili delle brave iputeghe .. Ah ! chi sà barcame-nassi un n'ha bisognu d'andà in America a fa bignetta ! Basta a racòglie ciò chi summenanu i sciòcehi, e ci n'è tanti ! Tiziu spende tempu, salute e sòlli in dònne, ch'u contracambianu, per lu più, cun brave

curnate; Semproniu si ruina in feste e teatri, Caiu in opare d'arte, Graccu in beneficenze rumurose, banità tutte! L'astutu prufitta di se ruine, seguitendu a sola regula di quattru e quattru ottu... Cusì facciu eo... Mi chiamanu egoista, usuraiu, runfone e peghiu! Cosa m'impôrta, se un mi diminuiscenu i guadagni?... Quelli stessi chi m'insultanu ôghie veneranu forse dummane a ghiubeddomine, per cheremi sòlli e perdonu... E, se ci trôvu u miò tornacontu, l'accôrd uolinteri, perchè sò cristianu... Un pònu dinne altrettantu elli, chi s'incontranu più spessu ai caffè che in chiesa... E pòi si lagnanu d'i castighi!... Mazz' c còrne!... Stu sciò Checcu, per esempiu, dice pubblicamente ch'eo mi pasciu di mòrti, di carogne, cumme i còrbi... E percosa? Perchè bôgliu levalli a so ultima cherne, una casa vindùtami a reméré! Un n'è ellu a causa d'i so malanni? Un crede nè a Dio nè au diavulu, c fonda cu i sòlli dill'altri, cu i mei, un'opara pretesa pia, un ricoveru pe i vecchj!... Ghiunghie a scadenza, e si trôva a brancha insù u fundatore!... So dannu! Un duvia fa u passu più grende che l'infurcatoghia...

Imprestu sòlli, e bògliu esse pagatu, capitale e interessi. Un n'è ghiusta ? Un si face nulla per nulla... E si filantropi, si Mece-nati, per cosa sciuppanu ? Per baggianeria, egoismu in fondu !... Pruffittai d'a gnucchezza d'u sciò Checcu ; se un fussi statu eo, sarebbe statu un altru : i gnocchi sò fatti per esse manghiati.

(entra Mai).

SCENA V.

UNCINU e Mai.

Uncinu (brusco)

Cosa vòli ?

Mai (umile)

Bengu per l'affare.

Uncinu (c. s.)

Ignurante ! Hai mille franchi d'ecunomie, fatte sopr' e mè spalle...

Mai (vivamente)

No, sopr' e mee !

Uncinu

Un m'interompel Hai, ripetu, accunzatu qui in casa, e Dio sà cumme, mille franchi! I cunfidasti au padrone, in manu sicura, e avà ti salta u grillu di scumbiàlli!

Mai

Dissi jà a Signuria ehi bògliu metteli à Cascia di risparmiu, perchè mi fruttinu qualcosa...

Uncinu

E se sta Cascia si sfonda un'altra volta, anderai a circalli au mare?

Mai

Ne risponde u Guvernu...

Uncinu

Quellu d'òghie... Ma sai tu quale serà quellu di dummane? .. Forse un branecu di ladri...

Mai

Sciò mi spaventa!

Uncinu

Ogna ch'è abbia judiziu ancu per te, chi stai e imbecchiasti in casa mea.... 'Ti

feraghiu una carità : hai òttu franchi au mese...

Mai

E travagliu tantu !

Uncinu

Ti ne dò nòve, e cusì pagu l'interessi anch'eo.

Mai

A Cascia di risparmiu dà dui franchi e settanta cinque per centu, mi l'ha detta u sciò Checcu.

Uncinu

Di tuttu s'imbarazza s'imbruglione !... Ebbè, faremmu dece, e un si ne parli più !

Mai

Mi raccomandandu a Signuria ! Sò una povera serba e, se cascu malata...

Uncinu

Dì cos'hai peura ? Ci sò eo : ti cunsideru cumme parente...

Mai

Speru che sciò un mi ferà mòre all'ospitale

(entra u sciò Checcu, ed esce Mai).

SCENA III.

UNCINU e CHECCU

Checcu (suridente)

Bonghiornu !

Uncinu (torbido)

Bonghiornu ! C'è qualcosa di nòvu ?

Checcu (c. s.)

Pare chi sia nulla a vòstra compra.

Uncinu (agitato)

Cumme, cummè !

Checcu (c. s.)

Un bi spaventate ! Per una svista d'u notaru, un duvete sòffrene voi...

Uncinu

Un galentòmmu.

Checcu

Si riferà l'attu. ... Bi dumandu solu sei mesi di più per liberammi...

Uncinu

Bo subito dau nutaru, e se stanu e cose
cumme dite voi, ne pagherà ellu e penc.

Checcu

Riferà l'attu senza spese. . Cosa pretendite di più?

Uncinu

Una fòrte indennità pe i danni sufferti.

Checcu

Chi danni? U stabile è sempre l'istessu.

Uncinu

E i prugetti ch'e' ci feci sopra, un li cuntate per nulla?

Checcu (suridendu)

I mettercte a esecuzione più terdi... se un bi pagu...

Uncinu

E se mi pagate?

Checcu (misteriosu)

Fòrse ancù... Ma un mi pòssu spiigà...
In ogni casu, avcrete u capitale; e, per fallu fruttà, un n'ete visognu di cunsigli.

Uncinu

Ritirai un piezzamentu sicuru, ch'e' destinava a trasformà a casa, cunsiderata jà cumme mca, e ottenene cusì almenu un doppiu interessu: un n'intendu vedemi defraudatu d'un guadagnu sicuru.

Checcu (nerbosu)

Sapete cos'è? Se b'intestate nell'idca di nòcc a un povar'òmmu che, in fondu, un n'ha peccatu che di leggerezza o, tutt'al più, d'ignuranza, eo ripigliu u miò bene...

Uncinu (malignu)

E i dinè?

Checcu

C'è chi mi li dà all'istesse cundizione... Cunsentite, sì o no, a accurdammi su respiru?

Uncinu

Un pòssu rispondevi prima d'avè discorsu c'u nutaru.

Checcu (ritendu)

Aspettu fin'a sta sera... E, dòpu, parlerà a cherta vullata.

(esce Checcu).

SCENA IV.

UNCINU, *solu.*

Un l'aghiu mancu dumandati cosa manca all'attu !... Qualchi furmalità !... Ci n'è tante in ste legge francesc, chi ci s'imbroglianu ancu l'òmmi d'u mistieru !... E nimmu è sensatu ignuralle ! Cos'aghiu da fa ? Cunsente à prupòsta d'u sciò Checcu ? O prucedu contr'au nutaru ?... Duvu ci sarà più guadagnu ?... Mi pare impussibile che u miò creditore, ch'è tantu infangatu, pòssa libcrassi au capu di sei mesi ; e, d'altra parte, cosa m'accurderà u tribunale ?.... Un'indennità insignificante : s'òmmi di legge si prutegghenu cumme i ladri in fiera... Se, cummè speru, enzi sò certu, u sciò Checcu un mi paga, ottengu per sei mila franchi un stabile chi ne vale almenu vinti.... Mustremmuci dunque umani, accurdendu un respiru... Ma sta vòlta si piglieranu tutt'e precauzione : prima di signallu, si mustrerà l'attu au sciò Bastianu, un avucatu di vaglia, e a cun-

sulta a pagherà, cumme di justa, u miò nutaru zuccone.

(entra Camillu).

SCENA V.

UNCINU e CAMILLU

Camillu (vivamente)

È bera chi bulètc fa au sciò Checcu un'esprupriazione? Cacciallu d'a casa induv'è natu? Privallu dill'ultimu avanzu, e u più caru, d'u so patrimoniù?

Uncinu (annuiatu)

Di cosa t'imbarazzi? Sò 'affari ch'un ti riguerdanu...

Camillu

A nòstra riputazione ci riguerda a tutt'e dui. U sciò Checcu è u miò amicu, un galentòmmu...

Uncinu (ridendu)

Un paga i so debiti...

Camillu (vivamente)

I nega forse?

Uncinu

Sfidu eo ! Ci sò delle brave obbligazione !

Camillu

È prontu a suddisfalle ! È un òmmu d'onore...

Uncinu

Cosa ne sai tu ?

Camillu

Bi lu pròvanu i so debiti stessi... Per quale l'ha fatti...

Uncinu (ridendu)

Pe u cumunu, cioè per nisunu. Un sai che u pòpulu è ingratu ?

Camillu

E sia ! U vè ghiova più a chi u face che a chi u riceve.

Uncinu (c. s.)

Belle massime per mòresine all'ospitale !...

Camillu

L'accumpagnanu per tuttu e venedizione...

Uncinu (c. s.)

dill'uscери, chi ci s'ariechiscenu sopra.

Camillu (nerbosu)

Un sò cose da ride !

Uncinu (c. s.)

Un ridu d'ellu, enzi u cumpiengu : è scemmu.

Camillu (c. s.)

Sta cumpassione è un insultu.

Uncinu (rabiosu)

Cosa pretendi ! Dittà legge au to vabu ?

Camillu

No ! Ma impedillu di cummette una gattiv'azione.

Uncinu (dolcemente).

Certe paròlle, un le suppurteria da un altru... Ma tu mi si' figliòlu, solu maschiu, erede d'u miò nome, d'a miò fortuna : un bògliu dispiegeti... T'interessi au sciò Checcu, n'è ?

Camillu (cun fògu)

È u miò amicu più caru.

Uncinu

Ebbè, si ferà qualcosa per ellu, per te :
bo a dilli eo stessu chi l'accòrdu sei mesi
di respiru.

Camillu (abbreccendulu)

Che bo' siate venedettu !

Uncinu

Ma, passatu u termine...

Camillu (suridcndu)

Qualchi Santu pruvederà.

Uncinu (ridcndu)

Racumandatevi a ellu perchè eo diventu
sordu a ogni priera... Simmu intesi...
Addio !

(esce Uncinu e scende u tendonc).

FINE DILL'ATTU II.

ATTU III.

SCENA I.

CAMILLU e PEPPA

Peppa

L'emmu vinta infine ! Ci accôrda sei mesi !... Ma dôpu ?

Camillu

Ne otteneremmu dill' altri, o un mi chiamu Camillu !

Peppa

Bravu ! Ogn'a succore l'onesti : u so esempiu cunsola e solleva... Senza di elli, cosa serebbe a vita ? Un cuntinuu agitassi ind'on pantanu !

Camillu (suridendu)

Ehi, furbacchiotta! Ind'o to entusiasmu
c'entra un zinzighinu d'egoismu...

Peppa

Mancu per ombra! M'inflammu p'e
virtù d'u sciò Checcu...

Camillu (c. s.)

E anc' un pocu pe a so persona, percosa
è un bell'òmmu? È bera ch'ha bint'anni
più di te...

Peppa (vivamente)

Se pare più giovanu di noi!

Camillu

A giuventù dill'enima li dà quella d'u
còrpu...

Peppa

E d'a prima m'innammurai.

Camillu (suridendu)

Anc'un po' dill'altra... Ma lascemmu
core!... Un bisogn'a frugà tròppu ne i
nòstri intimi pensieri, se un bulemmu fa
delle scuperte pocu gradite.

Peppa

Cosa pòi rimpruverà au sciò Checcu ? A
so vita è quella d'un Santu.

Camillu (c. s.)

E un ba à messa !

Peppa

Onora Dio facendu vè au pròssimu : Un
n'è questa a più bella priera ?

Camillu (ridendu)

Hai regiò... Ma a diccila qui fra noi,
passa i limiti ; e prucedendu cusì, ne u
so ospidale finiscerà per mòrci anch'ellu.

Peppa

U Signore un n'abbandona i sòi.

Camillu (c. s.)

A so ricumpensa, a ricevenu elli spessu
un po' terdi, nell'altru mondu ; e si la
meritana pe u martiriu chi suffrirnu in
questu... Ma un n'è a nòstra una cunver-
sazione tra fratellu e surella : è un beru
quaresimale !... Basta cusì e prediche
m'annuiornu sempre, e avà mi addurmen-
tanu più che mai. Ch'eo ti dia una vòna

nutizia pe rallegratti. Mi disse u sciò
Checcu chi spera d'esce prestu d'angosce,

Peppa

Qualch'eredità?

Camillu

Un mi l'ha spiigatu; ma dev'esse cusì,
perchè, poveru, un cunsenteria ellu a
spusatti.

Peppa

È cusì dilicatu!

Camillu

E, d'altronde, babu ci s'oppuneria.

Peppa

In quant'a me, u spuserebbe piuttòstu
poveru, per mustralli ch'u facciu per sim-
patia.

Camillu

Disgraziatamente un ragionanu sempre
cusì i genitori, e noi dipendimmu da elli.

Peppa

Allora aspettemmu... Ma ti dichiaru,
che u miò maritu serà u sciò Checcu o ni-
sunu.

Camillu

Peccatu ch'ell'un ti senti.

Peppa

Oh, l'averà induvinata da un pezzu ! Eo
un cambiu...

Camillu

Cara surella ! Un ci avanzemmu tròppu !
Ni jamais ni toujours, dice u Francese,
chi di cambiamentu è maestru !

Peppa

Eo sò Còrsa, e un li capiscu.

Camillu

Dill'antica stampa, perchè i Còrsi mu-
derni sò girivegule anch'elli.

Peppa

Sai cos'emmu da fa ?

Camillu

Se mi la dici, sì !

Peppa

Circhemmu di scòpre u segretu d'u sciò
Checcu... per tranquillacci.

Camillu (ridendu)

Da Eva in pòi a dònna fu sempre curiosa ; e a so curiosità ci custò caru assai.

(entra Mai).

SCENA II.

I PRECEDENTI e MAI.

Mai (rimettendu una lettera a Camillu)

C'è stu scrittu per Signuria.

Camillu

Di qual è ?

Mai

Imbè! dev'esse d'u sciò Checcu, chi mi lu rimise a so serba, racumandendumi di cunsignallu in pròprie mane.

Camillu

Benissimu ! Andate, Mai.

Mai (pianu, andendusine)

Cosa serà ? Steraghiu sentacchia.

(esce Mai).

SCENA III.

CAMILLU e PEPPA

Peppa

Laghilu subito!

Camillu (eprendu a lettera)

E cummè!

(leghe):

« Amicu! Per mezzu d'i santi si va in Paradisu: u sciò Uncinu m'accòrda sei mesi di respiru, grazie à vòstra putente intercessione... E, cumme a fortuna un bieghia mai sola, mi ne junse un'altra ancu più grata: U conte Nespula mi rimbòrsa e spese fatte pe u ricoveru d'i vecchj, a cundizione che l'ospiziu pòrti u sò nome; ed eo che, per difettu di mezzu, u vidia periculà n'è miò manc, ci cunsentu vulinteri, mòltu più chi si risarcisce cusì a miò casa incrinata e si rende quasi certa a miò desiderata unione c'à vòstra surella. Prima di parlanne au sciò Uncinu, bòlsi fabbine perte, affinchè cerchite a spianammi u

terenu, ne u casu, pocu prubabile, chi ci
fussinu ostaculi da vince.

» CHECCU. »

Camillu (ridendu)

Cosa ne dici, o Pè? Si' tutta annuvulata.

Peppa

Stu sciò Nespula, cun quattru sullacci,
s'acquista a gloria che u sciò Checeu si
meritò c'u so còre.

Camillu

Hai regiò; ma duvemmu pur esseli grati
d'avè resu pussibile u to matrimoniu...

Peppa

Temu sempre...

Camillu

Chi ragione pò avè babu d'opponesi?

Peppa

Nisuna!... Eppur mi trema u còre...

Camillu

Di giòia... Ma sentu muntà: dev'esse
vabu... Lasciami solu cun ellu!

Peppa

Scappu ind'a miò cammara... E, in casu di periculu, corgu in to aiutu.

Camillu (ridendu)

Un ne dubitu: u periculu è soprattutto tòiu. Ma un n'avè peura: eo solu vastu a triumfanne...

(esce ~~Peppa~~ Peppa).

SCENA IV.

CAMILLU, solu

Ci serà battaglia: babu è capace di spicula sopr'all'amore.

(entra Uncinu).

SCENA V.

UNCINU e CAMILLU

Uncinu (suridendu)

Si' cuntentu, o Cammì? Sagrifigu ai to capricci a ragione, diventendu pueta anch'eo... Ma un t'abbizzà!...

Camillu (suridendu)

Un sapete ch'è torna riccu u sciò Checcu?

Uncinu (c. s.)

Di speranze, n'è?

Camillu (c. s.)

No, di bravi marenghini! U conte Nes-
pula u rimbòrsa d'e spese fatte pe a fab-
brica dill'ospidale.

Uncinu (ridendu giallu)

Cridia ch'un ci fussi ch'on scemmu in
Bastia: m'abbegu avà chi ci n'è almenu
dui.

Camillu (c. s.)

Ci ne fussinu parecchj di si scemmi!...
Ma un b'esternò u sciò Checcu e so inten-
zione sopr'a Peppa?

Uncinu (suspettosu)

Chi intenzione? Eo un sò nunda!

Camillu

Bòle dummandabbila in matrimoniu.

Uncinu

Fece vè a un parlammine!... I miò
sòlli un divenu cincinassine all'ospidale.

Camillu (scandalizzatu)

Ah, per esempiu l... A quest'un m'aspet-
tava !

Uncinu

Perchè un n'hai judiziu.

Camillu

Cosa putemmu pretende di più ?

Uncinu

Stu sciò Checcu ha e stacche tufunate :
ci passò a so fortuna, e un terderebbe
• tantu a passacci quella d'a moglie... Per-
chè credi ch'ellu mi dummandi a Peppa ?

Camillu

Perchè l'ama.

Uncinu (ridendu)

A ella ?

Camillu

E cosa ?

Uncinu

A so dōta .. Crede truvacci Roma e
Toma in casa mea ! Povaru sciòccu ! Un
sà che, in stu mumentu, un pōssu dālì
man' un picciòl di figu !

Camillu (ridendu)

Pienghite sempre miseria, cu e mane piene...

Uncinu

Di prumesse, di ventu!... Oh, se mi pagassinu â scadenza i debitori, cumme s'impignornu ind'e so cambiale, un mi truveria cusì angusciatu! Ma avale un c'è più bôna fede, e un si pò cuntà che sopra una cosa : a visita d'u percettore.

Camillu

U sciò Checcu si cuntenterà di prumesse anch'ellu : obbligatevi per iscrittu a serveli ogn'annu l'interessi...

Uncinu (interumpendulu vivamente)

Obbligammi! Soga si malfida ellu? Tandu un femmu nulla .. E pòi so eo forse quantu pòssu prumetteli? Tutt'o più ottu o dece mila franchi di capitale!

Camillu (scandalizzatu)

Se mi diciste voi stessu di pussede mezzu milione!

Uncinu

U feci pe ride... S'e' n'avissi a medità, mi chiameria furtunatu.

Camillu

Ammettimmu ! Facenu sempre più di centu mila franchi pe a perte di Peppa.

Uncinu

Un mi pòssu spruvede... E pòi u quertu è pe u maschiu, per te...

Camillu (vivamente)

U ricusu : sò ste parzialità d'i genitori chi mettenu a zizania, u disordine ind'e famiglie. Peppa un merita d'esse cusi inghiuliata.

Uncinu

A so furtuna diventerà quella d'u maritu, d'un furesteru.

Camillu

Seranu u vòstru sangue i so figliòli !

Uncinu

Un purteranu u miò nome .. Ma parli di stu matrimòniu cumme se ne fussi cuntenta a to surella !

Camillu

Ogn' assicurassine prestu...

(chiamendu)

Peppa, Peppa !

(entra Peppa eurendu).

SCENA VI.

I PRECEDENTI e PEPPA

Peppa (vivamente)

Cosa c'è, cosa c'è ?

Camillu (ridendu)

U fògu in casa.

Uncinu (torbidu)

Ti si dumanda in matrimoniu.

Peppa (ridendu)

Un fògu di giòia !

Uncinu (c. s.)

E sta dumanda è irregulare, perchè mi
vene per bocca d'u to fratellu.

Peppa

Minca d'un furesteru !

Camillu

È l'usu d'incherganne una terza persona per evità fra l'interessati ogni pussibile ferita d'amurpròpria, chi puterebbe cumprumettene u successu...

Uncinu

Un usu sciòccu: i pròpri interessi ognunu deve trettalli da sè... Ma *transeat*... Un mi cunvene u sposu, e ancu menu cunvene a Peppa.

Peppa (vivamente)

Perchè?

Uncinu

Tu hai diciòtt'anni appena.

Peppa (c. s.)

Finiscu i dicennòve à Candilara...

Uncinu

Ed ellu ne ha quaranta sunati da un pezzu...

Camillu

Da un mese...

Peppa

U fior dill'età.

Uncinu

Tu' si' economa...

Camillu

Minca spilòrcia...

Uncinu

Ed ellu è sciuppatore...

Camillu

No, generosu...

Uncinu (nerbosu)

Alle corte! cercu sumigglianze tra boi,
e un scorgu ma' che differenze.

Camillu (suridendu)

Ete dettu a vòstra, lasciatemi di' a mea!

Uncinu (ridendu rabiosamente)

Ti si' sfugatu abbastanza!... Ma e pa-
ròle d'un òmmu d'esperienza averanu,
speru, più pesu che quelle d'un barda-
scione...

Camillu (c. s.)

I vecchj ragionanu, e i giovani sentenu
megliu; e, per ciò, sò questi miglior ghiu-
dici d'e cose di sentimentu.

Uncinu

E, per ciò, si troncanu u còllu !

Peppa (suridendu)

O vabà, lasciateli di' a sôia !

Uncinu

Parli puru, chi mi tuppù l'arecchie !

Camillu (c. s.)

Grideraghiu tantu, chi mi senteranu ancu i sordi ! U pertitu chi si presenta è perfettu, pare fattu per Peppa, una dònna seria, innammurata soprattutto d'e vellezze murale, benchè qui un difettinu mancu e fisiche... U giovanu...

Uncinu

Quarant'anni...

Camillu (c. s.)

A disse Peppa : U fior dill'età !

Uncinu (rabiosu)

Un po' guizzu.

Camillu (ridendu a Uncinu)

Mi par chi bi siate stuppàtu l'arecchie !...
Ma a chi pro' allungalla tantu ? U so nome dice tuttu : è u sciò Checcu !

Peppa

L'onore di Vastia!

(entra Mai).

SCENA VII.

I PRECEDENTI e MAI

Mai

U sciò Checcu!

Camillu (vivamente)

Fallu passà!

(esce Mai).

SCENA VIII.

I PRECEDENTI, menu MAI

Uncinu (suspettosu)

È una cosa intesa tra boi.

Camillu (ridendu)

Chi male c'è?

Uncinu (torbidu)

U viderai...

(contra Checcu).

SCENA IX.

I PRECEDENTI e CHECCU

Checcu (salutendu)

I miò rispetti !

Uncinu (bruscu)

Saltemmu i preambuli ! Sentite o seiò
Chè : eo sò un òmmu franeu e leale, e un
e'è cosa che più mi faecia rabbia che l'ar-
zigoguli e i eavilli.

Checcu (suridendu)

Cusì mi vantù d'esse eo... Ma mi pare
che di preambuli site più rieceu di me !

Uncinu

Oh, perehè nell'affari più semplici, bi
servite d'avucati pe imbruglialli ?

Camillu (suridendu)

Prutestu : l'imbruglione un sò eo, ma...

Uncinu (ridendu giallu)

Lascia parlà u giudice !

Checcu (c. s.)

Sentiamo !

Uncinu (a Checcu)

Bulete spusà a Peppa ?

Checcu (vivamente)

È u miò desideriu più caru !

Uncinu

E, imbecce di dumandalla au vabu ..

Checcu (c. s.)

Se bensi appòsta !

Uncinu

Circaste, prima, cun gabule u influen-
zalla ; e fòrse faciste peghiu, seducendu
un'innucente...

Peppa (vivamente)

Qui prutestu eo : se ci fu seduzione, fu
quella d'a virtù, ed ella onora u seduttore...

Checcu (nerbosu a Uncinu)

Insomma, site cuntentu, sì o no, d'avemmi
per ghiennaru ?

Uncinu

Cosa cridete truvà ind'a miò figliòla ?

Checcu (cun fògu)

Una moglie affettuosa e dònna di casa.

Uncinu

E ricca, n'è ?

Checcu

A cosa m'è indifferente.

Uncinu (vivamente)

E a pigliereste senza dòta ?

Checcu

Più vulin'eri che c'a dòta !

Peppa (vivamente)

Ed eo un ci cunsenteria : un sò minca una vasterda !

Camillu (vivamente)

Serebbe un affrontu ancu per me ! Cosa ne penserebbe u mondu ? Ch'eo prufittu di sa spuliazione !

Uncinu

Finchi bivu, a fortuna è tutta mea, e pòssu disponene cumme mi pare e piege.

Checcu (dolcemente)

Ete ragione, e bramu che bo' campite cent'anni pe u nòstru vè!

Uncinu

Alla bon' ora ! C'intenderemmu cusì.

Checcu

Dunque m'accurdate a manu di Madamigella ?

Uncinu

A sta cundizione, sì : senza dòta.

Peppa (a Checcu)

Bi manca una cosa indispensabile : u miò cunsentimentu.

Checcu (cun fògu)

E mi lu neghereste dòpu tante prumesse ?

Peppa

Bi lu prumise a figliòla d'u sciò Uncinu, e minca una povara vasterda.

Camillu (decisu)

Se persistite, o và, ne a vòstra risuluzione, un mi cunsiderate più per figliòlu : escu subito, e per sempre, d'ona casa duve si traffica cusì d'a cherne vattizzata...

Uncinu (raddulcitu)

Ma u facciu pe u vòstru vè ; i sòlli, in mane vòstre, si n'anderebbenu pe u fiume prestu...

Camillu

Tenitevi u capitale; ma l'interessu di centu mila franchi...

Uncinu (disperatu)

A tantu un ba a miò furtuna !

Camillu

Un mi cunfessaste voi stessu, pocu fa, chi pusseditte mezzu milione ?

Uncinu (c. s.)

Chi tempi, chi tempi ! Ci tradiscenu i pròpri figliòli !

Camillu (ridendu)

No, cercanu salvabbi.

Uncinu

Suppunimmu ancu ch'eo pòssa prumetteli sa dòta ! Chi interessu pò esige u sposu ? I sòlli un rendenu più nulla.

Camillu

U Statu paga u tre per centu.

Uncinu

Oghie... Ma chi risponde di dumane?...
Si preparanu cunversione, impresti, nôve
imposte, e fôrse corsi furzati e tanca-
rotte .. Quand'è sicuru u capitale, furtu-
natu chi ne ricava u dui per centu !

Camillu (suridendu)

Baga p'o dui !

Uncinu

E l'interessi un si pëganu che una vòlta
maturati, â fine dill'annu.

Checcu (suridendu a Uncinu)

È detta ! e poichè d'a vòstra fortuna site
cusì saviu amministratore, bi cunfidu
ancu a mea.

Uncinu (abbreccendulu)

Avà, sì, chi bi pruclamu u fior d'i galen-
tômmi, e crescu d'un quertu per centu i
vòstri interessi...

Camillu

Coru subito dau nutaru...

Uncinu (torbidu)

Aspetta ch'e' sia môrtu per fa qui da
padrone ! Un c'è furia !

Camillu (ridendu)

Fôra u dente, fôra a pena !

Checcu (suridendu)

Noi un bulemmu arancalli nunda.

Camillu (pianu a Checcu)

Si dui e un quertu per centu ..

Uncinu (torbidu)

Avà ci vegu chiaru : site tutti d'accôrd u
pe spugliammi. : .

Checcu (vivamente)

Bi dissi, e bi ripetu, ch'eo un tengu che
a una ricchezza : à vòstra figliòla.

Uncinu

E, intantu, esigite i dinè !

Checcu (c. s.)

Eo no !

Uncinu

Dumandalli o falli dumandà è l'istessu.

Camillu (vivamente)

Se l'accurdaste pocu fa !

Uncinu

E bidendu a vòstra malfidenza, ritiru a miò paròlla...

Camillu (rabiosu)

Ma...

Checcu (supplichevule a Camillu)

Un mi rendite disgraziatu c'a vòstra insistenza !

Peppa (agitata)

Un pòssu ..

Checcu (interumpenduia dolcemente)

Se mi fussi lecitu, bi ne pregheria in dinòcchie, Madamigella : luntane da nci e quistione d'interessu ch'un pònu che nòce au nòstru amore !

Peppa (c. s.)

Dunque...

Checcu (c. s.)

Cuntentemmu u seiò Uncinu, proven-
duli chi tenimmu più ae persone che à
roba, ed ellu un si scurderà d'i so figliòli. .

Uncinu

Paròlle sante !

Peppa (a Checcu)

Se dumandu u miò duvutu, un lu facciu
per me...

Camillu (rabiosu mustrendu Uncinu)

Ma per ellu, chi si disonorerrebbe nighen-
dulu!

Checcu (a Peppa)

I nòstri gusti sò semplici : c'a miò pic-
cula fortuna, puteremmu cuntentalli e
suecore aneu qualche bisugnosu...

Uncinu

Soprattuttu se, cumme u prumettiste,
mi ne cunfidate l'amministrazione. E cusì,
ghiè una cosa intesa : senza dòta!

Checcu (tucchenduli a manu)

Senza dòta!

Uncinu

E u curedu?

Peppa

È prontu da un pezzu!

Uncinu

Sia laudatu!

Camillu (ridendu a Uncinu)

B'è sparita a pena ?

Uncinu (ridendu)

Serza levammi u dente ! U sciò Checcu
è beramente un dutturone.

Camillu (c. s.)

Pagatelù almenu cun qualchi buttiglia di
vinu ch'aghiu scupertu quallà sott'a scala.

Uncinu

È pocu, e si cunserva p'ona malatia.

Camillu (c. s.)

Per quand' un si pò beie ! cumme i pul-
lastri e c galline per chi un ne pò manghià,
pe i muribondi : è l'usu di Vastia !

Uncinu

Ma u sciò Checeu è scapulu, e di vini
vecchj deve fanne pruvista !

Camillu (ridendu)

Se un beie ma' che ecqua, cumme Peppa !
Seranu unghia e cherne insemme !

Checcu

Mi rigalornu, tempu fa, una vuttiglia di
Kirsch.

Uncinu

A miò passione !

Checeu

Eo un so cosa fanne.

Uncinu

Datemila, o sciò Chè ! chi mi juverà p'e
miò debulezze di stòmmagu !

Checcu

È chiaru più che l'acqua di Vivincu...

Camillu (ridendu)

Quand' un n'ha piòssu... Mandemmulu
a piglià da Mai...

Checcu

È in sala, sopra u buffet...

Camillu (c. s.)

Eo e babà ne vieremmu un bicchieru...

Uncinu

Un bicchierinu...

Camillu (a Checcu)

E per boi e p'a sposa...

Checcu (ridendu)

Pruverà a funtana.

Camillu (c. s.)

Cusì almenu si salveranu l'apparenze,
gudenduci tutti un beveraggiu dill'istessu
culore.

Uncinu

Chi giuventù sfrenata! Un pensa ma'
che à gola!

Camillu (c. s.)

Poichè Dio ci la dede, ogn'a pensà ancu
ad ella, bagnendula di quandu in quandu
di licore. Sinnò, un ne pònu esce dolce
paròlle nè canzone... Ghiustamente, mi
ne sentu muntà una, e bi la schiccheru
subitu...

Uncinu

Mi pare che tu diventi scemmu!... Oh,
in manu di quale cascherà a miò fortuna!

Checcu (ridendu)

D'un galentòmmu, cumme vi lu mostra
a so schietta allegria: i virbanti un sanu
ride che giallu.

Camillu

Principiu: Attenti! Mi farete u còru.

(canta)

Fonte eterna d'armunia
Che distillaci Natura,
Gran tesoru è l'allegria,
E d'i ladri un n'ha peura !
Più dau còre ti ne esce
E ne dà, e più ti cresce !

Tutti, menu Uncinu

Più dau còre ti ne esce
E ne dà, e più ti cresce !

Camillu

E per l'enima un curdiale,
Chi li dà fôrza, custanza
N'e vattaglie contr' au male,
E di vincele speranza...
D'ella priva, un n'è a fortuna
Che una cheriga impurtuna !

Tutti, menu Uncinu

D'ella priva, un n'è a fortuna
Che una cheriga impurtuna !

Camillu

Ella è cumme un sole internu
Chi rischiara i jorni negri
E ci scalla in pienu imbernu...

Dunque, amici, stemmu allegri !
E lascemmu ind'o so fumme
I merchanti di nigrumme !

Tutti, menu Uncinu

E lascemmu ind'o so fumme
I merchanti di nigrumme !

(scende u tendone).

FINE D'A CUMMEDIA.

420595